



2. august 2013

UKA 2013/123

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiupparput:

Qanoq iliornikkut nunatsinni ineqarnikkut piaarnerusumik pitsanngorsaaneq, nutarsaaneq inuillu illut, inissiat attartukkatik piaarnerusumik pigilersinnaaneraat apeqquteqaat aallaavigalugu oqallisissiaq

(Inatsisartunut ilaasortat Siverth K. Heilmann aamma Gerhardt Petersen, Atassut)

Tunngavilersuut:

Nunatsinni nuna tamakkerlugu ineqarnikkut annertuumik ajornartorsiuteqarpugut. Ajoraluartumik pisortat inissianik illunillu piginnittuunerat suli annertuallaarpoq. Inuit namminneq illoqalernissaannut periarfissarititat ukiut ingerlanerini pitsanngoriarsimagaluartut, suli sinerissami nunaqarfinnilu aningaasaateqarfinnit, aningaasatigullu atorsinnaanerup ilaatigut aamma killeqartitsivallaarnera pissutaaqataalluni inuit amerlanerit namminneq illoqarnissaat killilersorpaa.

Pisortat inissiaataasa, illullu allat eqqarsaatigalugit tulleriissaartumik aserfallatsaaliuineq, nutarsaanerillu pisariaqartitsineq sanilliukkaanni naapertuutinngitsorujussuupput. Ukiullu ingerlanerini kinguariartuinnarpoq, taamaasilluni nutarsaanerit, aserfallatsaaliuinerillu akitsoriartuinnarlutik. Tamanna innuttaasunut, attartortunut naammaginangitsorujussuuvoq, naggaterpiaatigut taakuummata akiliisussat.

ATASSUT-miit isumaqarpugut nassuerutigisariaqaripput, pisortanit aningaasaliissutigineqartartut naammaqqajannimmata. Soorlu tamanna „2012-mi ineqarneq pillugu naalakkersuinikkut ingerlatsinermut nassuiaat“-mi 2012 marts-mi saqqummersumi atuarneqarsinnaasoq.

ATASSUT-miit pingaartutut isigaarput allatigut nalilersueqqittariaqartugut naapertuunnerusumik ineqarneq pillugu politikkeqarnissamik. Attartortut qanoq periarfissinneqarniarpat? Illut ukiorpasuarni attartorlugit akilersorsimasatik naapertuuttumik akilerlugit pisiarisinnaassavaat? Imaluunniit namminneq aserfallatsaalillugit nutarsartussanngorlugit pigilersinnaavaat? Taamaasiornikkummi pisortat aningaasartuutissaat aamma annikillisussaapput, kiisalu innuttaasut namminneq pigisaminik angerlarsimaffeqalernissaat angulertorneqassaaq.

Ukiuni kingullerni ajoraluartumik ineqarnikkut aamma allatigut ajornartorsiut piulerpoq, tassalu silaannaap allanngoriartorneranik pissuteqartumik nunap qeriuannartup aakkiartorneranik illut sanaartukkat toqqavii nikikkiartormata sumiiffippassuarni, kiisalu aamma oquk inissiarpassuarni illorpassuarnilu ajornartorsiutaalernikuulluni. Tamanna annertuumik illut inissiallu aserfallatsaaliornissaannut, nutarsaanissanullu piumasaalerpoq annertoq naammassiniarnissaalu ukiuni qanittuni ilungersunassaaq.

ATASSUT- miit isigaarput anguniagaassasorlu innuttaasut amerlanerpaat namminneq angerlarsimaffitik pigissagaat taamaasiornikkut ilaqutariippassuarnut toqqissisimasumik avatangiiseqarlutik meeqqaminnik perorsaanissaat, tassuunakkullu isumakuluuteqaratik ilaqutariit inuunissaat pingaaruteqarmat.

Angerlarsimaffik toqqissisimanartoq pilersinneqassappat, innuttaasut nammineq iniminnik, illuminnik piginnittuulernissaat angoqqaartariaqarpoq. Tassuunakkut ilaqutariippassuit avatangiiseqarlutut tunngavissinneqassapput.

Inerititaqarfiulluartumik oqallilluartoqarnissaa qilanaaraarput.